

四庫全書

子部

欽定四庫全書

子部
通雅卷二十一

詳校官中書臣朱文翰

員外郎臣牛稔文履勘

總校官降調編修臣倉聖脉

校對官中書臣高中

謄錄監生臣王官

欽定四庫全書

通雅卷二十一

明方以智撰

姓名同姓名

同時及異代同姓名 湘東王有同姓名錄如顏回為
羌帥曾參為市人平原哭墮井之毛遂翟公疑秋胡不
許婚是也卮言列之兩韓信俱高時一楚王一韓王按智

史通言名信都又誤矣 三召平一故秦東陵侯一為陳王上柱國

一齊相按為陳王柱國謂為陳勝徇廣陵者見項籍傳齊王相見齊哀王傳恐東陵侯即陳封者秦自

王翦父子外少微侯
侯兩王恢俱武帝時一浩侯一大行
侯矣不應有東陵侯

謀誘北軍者兩王臧武帝朝一郎中令二年自殺一六

年為太常兩王商俱成帝外戚一丞相樂昌侯一成都

侯兩王章俱哀帝時一建平三年為右將軍一四年為

京兆直言死兩王崇俱平帝時一丞相嘉子一大司空

扶平侯兩王莽一見霍光傳
崇禎時見賀無黨疏用之
相公不知而擬票切責

魏兩王烈一字彥方化盜一有道術謂嵇康不遇者兩

王渾一戎父一濟父兩王澄一濟弟一戎從弟兩孫秀

一吳降將一趙王倫嬖臣俱驃騎封侯兩周撫一王敦
將一彭城內史朱梁兩王琳一散騎常侍一德州刺史
唐兩李光進俱代宗朝一為光弼弟一為光顏兄俱蕃
將賜姓為節度封公兩李繼昭俱昭宗時一為孫德昭
一為符道昭俱賜姓名降朱梁為使相宋兩王著俱太
祖時一以文學典制一以書學待詔又曰兩慶忌一王
僚子一夫差將智按山澤鬼善走曰慶忌呼其名可使千里往報故人取名兩莊蹻
一莊王時盜一莊王裔孫平滇兩王鳳一元后兄一為

更始成國上公兩王譚一宜春侯一平阿侯兩徐幹一

作中論一班超司馬

智按張懷瓘載徐幹字伯張善章草班固與超書稱之蘇班皆為張

伯英所稱嘆

晉兩劉毅一光祿大夫一衛將軍兩張禹一丞

相一太傅俱封侯兩解系一見陶璜傳一自有傳兩王

愷一武帝舅一安帝時為丹陽尹兩蕭鈞一蕭鸞子一

蕭瑀從子元兩伯顏一太傅淮陽王一大丞相秦王兩

張昌宗一高宗初學士一則天時兩王方慶一則天時

相一領尚藥奉御若異代同姓名者兩王肅一曹魏一

元魏兩王彥章一梁將一吳統軍兩王溥一唐懿宗朝
一周世宗相兩李通一漢一魏兩王孫賈一魏大夫一
齊大夫兩徐邈一魏字景山一晉字仙民兩張遼一魏
一漢兩江革一漢一晉三李密一養祖母一後魏一隋
末又不在此例則元瑞所彙有八李祐六李福四李晟
李紳豈止兩副座頭俱李益耶元瑞曰三孫子三鄰子
世所共知又有不得不辯者二孔甲一黃帝史一仲尼
孫俱著書名盤盂

一載藝文志
一附孔叢子

二牟融一漢太尉一布

衣俱書曰车子

一載隋藝文志一附弘明集中今藝文志之车子不傳而弘明集之车子傳遂

以釋之车子傳儒之车子矣又夏帝名孔甲而唐詩人有牟融尤奇孔叢之盤孟疑崇文目誤而弘明之车子

余疑為偽兩嚴遵一君平一子陵皆易姓君平一名尊一名尤亦見傳中智以

為或相慕或附會而訛兩樊崇俱賊帥一赤眉一尤來兩李育俱

賊將一屬王郎一屬公孫宋兩李定一彈蘇子美一彈

子瞻李定劾蘇舜卿見朱子語錄兩韓文公一昌黎一南唐熙載兩

少室山人一李筌一李渤兩呂東萊祖居仁孫伯恭俱

以東萊名集兩石林居士一吳縣人位執政見宋史一

松江人官至尚書見一統志

皆名夢得皆徙湖州陸文裕外集載之此亦漢之兩

杜子夏也兩李商隱一玄宗朝見舊唐書一義山兩李抱真

一抱玉弟一李匡威寮屬兩李克寧一李澄子一克用
弟兩李伯禽一太白子一見通幽記智按此類甚多如
史記兩淳于髡一見孟子傳後一見滑稽三國志兩王
雙蜀斬王雙而吳亦斬其將王雙必二人也陶弘景刀
劍錄有王雙與曹真換刀王胡皆未載然胡所編為功
亦夥洪洲全搜依然有漏惟取全史作通編始成全書

今特撮其要者以便觀覽耳

向聞甬東余寅僧果有同姓名錄萬歷間人又南昌

宗侯統稽有同姓名錄十卷專門輯此廣昌劉大千作古今代譜亦集之須資其本再考焉 七脩類

藁言漢高帝有謁者貢禹武帝時王褒朱買臣元帝時

有尚書左僕射王褒武昌太守朱買臣智又按梁元帝

遣朱買臣嘗以楊何弟子之京房宣帝時公孫康所遣之

張敞在度傳最易混目近見人論賈充之父通經漢臘之

人非調則以兩賈逵兩陳咸為一矣逵一漢人一魏人咸一相人萬季子

一茂人見諸公擿辯大有益于學者元瑞言五王褒而

陳寵傳

漢有三一字子淵武帝時人上得賢臣頌者一字子澄
武帝時人得道治王屋山與郊祀志之王褒為三又後
周王褒字子淵唐避諱改子深智按郊祀志者即五行
志之天帝使我居此者以上得賢臣頌之王褒為武帝
時則非矣褒傳魏相奏知音趙定龔德等刺益州王襄
乃請子淵作中和樂章乃徵之此宣帝時人元瑞又言
三王建一晚唐詩人一唐末據蜀一前漢表元延元年
石晉棣州刺史見唐餘記

有廣陵太守王建為京兆尹反遺之而路史言有十餘

可見淹攷一事須暇豫彊識藏書最富乃能勝任耳路
史曰昔聞唐堯虞舜矣梁史又有虞舜官丞太常薦明
堂之議而漢更有唐堯為臨武長堯舜而可名哉予既
述祝融共工帝魁青陽高陽渾敦夏后啓商湯有巢豕
韋之不同矣如劉弘王褒皆有十一張良有九而張敞
王吉皆有八士勾相鞅壽夢臣越書才四代載兩伯夷
而論語有兩南宮迨王羲之仕苻健張華之佐慕容德
皆其類也蕭繹陸善終俱著同姓名錄然特不能包刺

請誦其涉史曰古有庸成氏而黃帝臣亦曰庸成伏羲
曰蒼牙而天雷之吏亦曰蒼牙義臣曰巫咸而來又商
家帝臣曰朱宣而為唐刺濮離婁事黃帝則論彼商臣
張若事黃帝則指夫秦士趙隱仕商國而亟舉魏賢馮
夷友費昌而竟談河伯觀叔均而思稷子

山海經商見
均曰叔均

習朋而思齊臣贊風后而為軒師

禹時有
風后

疑伍胥為楚

族黃帝臣
有伍胥謂赤松為炎帝諸侯

王初平亦
號赤松

季連為柳惠

等伍陸終之子曰季連
又季克之子亦名仲行為戲之弟

紂兄亦
曰仲衍

孔甲為

孔子之孫

孔子八世孫名鮒

帝嚳之臣有窮之君俱曰羿以射

名少昊之子魯國之士皆曰般以巧著虞仲之孫實曰

虞仲蔡昭侯申實蔡文侯申曾孫之子也漢趙王如意

而廣宗又名之唐義成曰琮矣而奉天又名之鬱林曰

恪矣而建王又名之此何為耶晉王氏一譜有兩渾昶子

戎兩愷

一字茂仁一字君夫

兩綏

愉子戎子

兩又

緒父衍父

兩澄

濟弟衍弟

兩處

仲

敦字一湛字

兩安期

湛子含子

豈惟他族慕用而無識哉智按

所云兩渾之類非矣晉書昶子渾字玄冲太原晉陽人

渾弟湛

去聲

字處冲非處仲也王濬冲父渾乃瑯琊臨沂

人澄字平子而王玄冲之弟亦名澄烏得謂太原王瑯琊王為一族乎其曰漢唐堯為臨武長者亦誤按後漢書和帝紀舊南海獻龍眼荔枝以臨武長唐堯上狀省之章懷注云堯得報即棄官還家今乃以堯為堯注止引范志范乃據後漢書羅偶見本訛耳且堯舜為名甚多不足異也漢趙堯趙禹張禹絮舜又永光元年大司農堯元延元年護軍都尉甄舜綏和二年執金吾謝堯

為大鴻臚宋制科題有堯舜禹湯所舉何如乃魏相引
高帝時言宮中謁者趙堯舉春李舜舉夏倪湯舉秋貢
禹舉冬各職天子所服也如此類可盡數耶又按有同
名稱不必實同姓名者有四孔子朱張楊震劉現迦葉
三顏子孔融王憲兒童四曾子漢成都張霜號張曾子
北朝南昌滕曇恭號滕曾子平棘李士謙其伯父楊曰
吾曾子唐桐廬陳京曰如曾子孟子字子輿曾子亦字
子輿孔伋字子思秦人燕級亦字子思級亦從學聖門

如是者亦不可勝數

兩羿 一弒夏后者一堯時射落鳥者見天問注或以
琴譜之羿為三益即有窮也說文引彗善射按其辭曰
羿射日落九鳥以羿射為句一日而落九鳥非射日也
後人誤讀耳

扁鵲秦少齊 成式笑任道昇呼扁鵲為扁後讀甄立
言本草引曹憲音布典反乃信之又言扁鵲姓秦字越
人扁縣郡屬渤海智按地志無扁縣而周禮釋文引史

記姓秦名少齊越人此為近之然今史記無少齊二字
其曰扁鵲者黃帝時有扁鵲而秦越人在戰國時人號
之為扁鵲今所傳難經乃越人作非黃帝之扁鵲也託
名耳宋雷斅作炮灸三卷亦非黃帝時之雷公漢志有
黃帝扁鵲俞附方隋志有雷公注神農本草四卷此乃
非戰國之越人宋之雷斅然必偽託者師古注人表輪
邊即輪扁扁音偏足知古皆平聲其作鵲者海篇之誤
收也

兩士句 昭六年左傳齊侯如晉請伐北燕也士句相
士鞅逆諸河禮也疏曰士句是范宣子即士鞅之父也
不應取其父同姓名人以為介董遇王肅本作王正為
是王元規云古人質口不言耳何妨為介按士文伯是
士鞅之族亦名句今相范鞅即文伯也魯仲嬰齊莊之
孫即公孫嬰齊之從祖鄭公孫段字子石而印段亦字
子石古人自不為嫌

兩張祿 范雎入秦為張祿學者蓋不知秦先時自有

張祿也初孟嘗君悅張祿先生奉之黃金文織祿辭不受謂孟嘗君曰秦四塞國也遊宦者不得入焉願為吾為丈尺之書寄我于秦王往而過乎固君之人也往而不過乎雖人求閒謀固不過矣孟嘗君因為之書寄之秦王往而大過考田文之卒在范睢未入秦之先則張祿入秦居睢前久矣睢入秦踵名張祿豈祿嘗有聞於諸侯秦特令睢冒其名以誑鄰國耶此筆乘抄之南山墨談者

五公孫弘 一在齊為孟嘗君見秦昭王一在中山為
參乘言司馬喜相求其一在越斷髮其一為漢平津侯
其一明帝時幽州從事交通楚王英見虞延傳弘字次
卿見鄒長倩書此平津侯也

著書之張萬福不必武將五代之酈炎集不必東漢之
文勝也 長睿譏崇文總目張萬福唐人有傳而云不
詳何代人酈炎集當在前謂為宇文勝者也按有三張
萬福一德宗朝救陽城人所共知者一與柳芳同時見

酉陽雜俎第七卷以醫名一撰五等朝儀見通志畧乃
道家者流又通志五代有鄺炎集後漢亦有鄺炎集或
五代時有同名者未可知也升菴以薛仁貴能詩安知
不更有一仁貴耶正與張酈同類

兩智永 元美曰一梁畫僧一宋畫僧按智永禪師右
軍徽之後安西成王諮議彥祖之孫廬陵王胄昱之子
謝少卿之外孫也與兄少賓俱出家當梁時歷陳閔隋
年百餘乃終研北志云智永本名法極但著心成頌其

一無所為而姑以筆麈遊於天地之間者乎宋智永見
鄧椿公壽畫繼成都僧也宇文季蒙龍圖請住院永辭
曰永親在未能也嘗作瀟湘夜雨圖上邵西山

姓名 鬼神

鍾馗一作鍾葵終葵 唐人題吳道子畫鍾馗曰明皇
驪山還宮不懌因疔夢大鬼制小鬼吳道子畫之熙寧
五年上令畫工模搨錢版印賜兩府輔臣各一本是歲
除夜遣入內供奉官梁楷就東西府給賜鍾馗之象觀

此題似始于開元李石曰北史堯暄本名鍾葵字辟邪
于勁字鍾葵宋宗慤母妹名鍾葵按皇祐中金陵上元
縣發一塚有一石志乃宋征西將軍宗慤母鄭夫人之
墓漢大司農鄭衆女也慤有妹名鍾馗智以此即李石
所云宗慤妹懿慤字近也漢鄭衆相去遠或其曾孫女
乎後漢有李鍾馗隋將有喬鍾馗楊鍾馗然則鍾馗之
名非起開元升菴引杼上鍾葵首鍾葵菜止證其有此
諛語也元瑞曰六朝已有鍾馗後人附會作傳諸取名

者皆以鬼神為名也硯石鍾馗以其形耳周禮注齊人謂椎曰終葵

神茶一作茶與鬱壘鬱雷鬱榻鬱律 山海經二神神

茶鬱壘升菴引風俗通作鬱律陸法言韻壘音律神茶

者神舒也沈休文曰鬱壘者屈律也又為黼黻王充云

鬱壘嶷嶷之類沈又作黼黻古文作宛律智按演繁露

曰東海度朔山大桃二神一曰茶與一曰鬱雷王楙作

鬱檉引括地志曰度朔桃二神一名鬱一名檉鬱壘屈

律音轉隨人分合隨人書名耳唐人尚有屈律語紀事
曰田八二十一果頭三屈律言黃巢也

釁毅儼鬼 東方朔罵鬼書有釁毅儼之名按即果
毅二字後人造此字以名鬼耳陳無功引作釁毅儼鬼
或曰釁音拂

竈囡一作竈囡 雜俎人影九重皆有名第七重曰竈
囡以其么小而幻故作囡音公

回祿謂吳回祿終也 吳曾曰楚世家云顓頊生稱稱

生卷章章生重黎黎為高辛氏火正帝嚳命曰祝融共
工氏作亂帝嚳使重黎誅之不盡帝乃以庚寅日誅重
黎而以其弟吳回為重黎後復居火正為祝融吳回生
陸終終生子六人六曰季連楚其後也可知祝融後為
吳回陸終回祿合稱祿陸音通也故今稱火災曰回祿
張僊乃孟昶 花蕊夫人入宋宮懸故主蜀王挾彈圖
于壁即孟昶也藝祖詰焉夫人曰蜀祀張僊神令人有
子蜀人劉希召秋官說蘇老泉時去孟蜀近應知之

水神屬陰故曰天妃今以為林氏 天妃宮江淮間濱
海多有之其女子三人俗傳神姓林氏遂實以為靈素
三女太虛之中惟天為大地次之故天稱皇地稱后海
次於地者宜稱妃耳蓋所祀者海神也元用海運故其
祀為重司馬溫公謂水陰類神當為女子或云宋宣和
中遣使高麗遭颶風賴神以免使者路允迪言于朝始
有祀一統志云天妃宋巡檢林愿女按宋時巡檢今都

撫類

馮夷河伯有多名 穆天子傳作無夷山海經作冰夷

河圖言姓呂名夷淮南作馮遲

音憑

金匱言名馮循元

瑞曰竹書洛伯用與河伯馮夷鬪河伯自為諸侯而馮夷原諸侯姓名智又按淮南馮夷大丙之御容齋隨筆曰此別一馮夷或諸侯同名干寶言宋時弘農馮夷八月上庚溺死天帝署為河伯五行書曰河伯庚辰日死不可治船遠行梁簡文帝船神記云船神馮耳智按俗呼耳與以混故馮夷訛馮耳河自神而名則附會也

梓潼神張亞子一作蛩子 其所注化書名揮始造弦
張網羅因以張為姓張仲事宣王幽王初以直諫賜死
為雪山神尋為趙王如意又生嫁張翁陷城邑救父母
以殺多譴為邛池龍遇釋迦脫罪又生西晉時跨白驢
去又見姚萇按王氏見聞所載陷河神張惡子事略類
惟云雋州不言邛池北夢瑣言梓潼張蛩子神乃五丁
拔蛇之所也一統志建炎以來景封

晏公為水神 元人尸解江楚祀之明封為平浪侯

楊回即王母 集仙傳言王母姓侯而酉陽雜俎言王
母姓楊名回字婉姪按郭璞注爾雅以西王母在西山
海經言虎齒有尾曰西王母此謂外國之人耳穆天子
傳西王母正如外國之君長後乃附會以與東王公相
對

麻姑兩說 建昌府志麻姑為王方平之妹而黃州志
云麻姑乃石勒麻秋之女魯公碑降括蒼蔡經家建昌
志又云降吳門蔡經家此魯公筆神耳

城陽景王江左憤王江神子胥漢壽關帝水府屈子

庖言曰古稱生為名臣歿為名神其最炳著者北土則
城陽景王江左項王神於吳興尤烈及江神伍員按景
王即朱虛侯劉章平呂氏亂封王二年而卒項羽據吳
興太守正衙為祠太守履任殺車牛祭不然即死而臨
汝侯蕭猷至每享神對飲神像亦色赭嘗為猷破盜智
又按南史蕭琛傳吳興名項羽為憤王琛遷之于廟卒
無恙云子胥有素車白馬驅江潮之異故祀為江神唐

狄仁傑采訪江南盡毀諸淫祀獨留員及泰伯季札祠
而移檄項王毀其廟按吳興項王碑陰有顏魯公題云
西楚霸王秦末與叔梁避仇吳中蓋湖州也觀此題則
顏公時廟尚在豈狄公既毀而湖人竟復之耶漢之關
忠義至隋世於荊州玉泉寺見靈跡至宋崇寧時帝勅
天師張虛靖召關公破蚩尤復鹽池見靈遂封崇寧真
君永樂北征本雅失理經濶灤海幹難河勒銘禽巫山
每見神前驅如關公其馬白凱還居民言有白馬立正

陽門殿至暮汗出乃制崇祀五月十三祭萬曆四十二年遣司禮李恩捧旒袍封大帝水府廟為屈平大夫各處祠之

張天師陵之後也 正一嗣教大真人張氏始祖張陵與張角同法持九節杖為符祝病人叩頭思過以符水飲之為三符一著山上言天也一埋地一沈水曰三官病者家出五斗米智按三國志裴注角事露至反族滅而陵在蜀僻傳子衡孫魯遂據蜀漢垂三十年曹操破

之請降封侯傳國至唐宋間復世掌道教李膺蜀記云
張陵避瘴丘社得咒鬼書遂解使鬼入鵠鳴山自稱天
師漢熹平末為蟒蛇所喻子衡奔走尋屍無所乃假設
權方以表靈化生糜鶴跡置古崖頂光和二年遣信告
曰正月七日天師昇玄都衡為係師魯為嗣師以遂惑
天下李膺非元禮漢蓋有兩張衡兩李膺也而隋又有
張衡南史又有子平張衡亦字子平為漢刺史仙去道
家因附會之

靈濟二真君 太宗嘗夢二神人言南處海濱來輔家
國明日禮官言閩中靈濟二真君事遂遣使函香請神
像作宮祀之英宗初加封記稱南唐義祖之子知證封
江王知諤封饒王按南唐書知證後封魏王

真武帝君碧霞元君 武當岱嶽今最感重永樂建真
武廟於太和山幾竭府庫設大璫及藩司守之而二廟
歲入香銀亦以萬計真武封號且百字蓋北方玄武神
以避宋宣祖諱改真武龜蛇表北方耳碧霞元君起于

華山小石池冬夏不涸號玉女洗頭盆因附會為王母
七女訛而為泰山按神異經云西方大荒中有聖人焉
長丈腹圍九尺踐龜蛇戴朱鳥然則後人于大石中得
龜蛇像歸之真武者疑即此徵也若謂神農時有淨樂
國王皇后之說尤不經矣武當又有謝允仙事故名謝
羅山甄異記甚詳而酈善長謂為羅令續搜神記言謝
允從武當山在桓宣武坐言及左元放為曹公致鱸事
老子名號 名耳字伯陽一名雅字伯宗一名志字伯

光一名石字孟公一名重字子文一名定字元陽一名

元字百始一名顯字元生一名德字伯文

玄妙篇云初生時名玄祿

其化生曰萬法天師曰盤古先生有古大先生曰鬱華

子曰大成子曰廣成子曰隨應子曰赤精子曰錄圖子

曰務成子曰尹壽子曰真行子曰錫則子曰變邑子曰

育成子曰經成子曰郭叔子曰河上公云三皇時曰玄

中法師金闕帝君或云化為范蠡又云周武王時為守

藏史昭王時過函谷關又降蜀青羊肆會尹喜同渡流

沙穆王時復還中夏平王時復出關開化蘇鄰諸國還
中夏秦時兩度散闕蓋過函谷者一而出散闕者三老
子母曰玄姪玉女亦稱尹氏化胡經稱老子投淨妙夫
人體為釋迦顧歡所舉者也又按前涼錄老子父名乾
字元杲遷疑聃即太史儋班因以太史儋列中上與孟
子同時而孔子時無聃

王喬不一 七脩類稿曰漢明帝時葉令王喬乃飛舄
者周時王子喬乃吹笙者神仙傳蜀人王喬乃食肉芝

者史記封禪書注緱氏仙人庵王僑犍為武陽人凡四
王喬元美載二元瑞載三王子喬即晉王非姓也又王
喬有弟周益公跋大皋渡永興觀舊碑王仙諱子繇字
大皋廬陵有玉山王田村嘉福觀大皋度值夏市皆其
迹也碑謂晉永嘉飛升而郡人葛導岷云漢王喬至晉
永嘉二百餘年按湘東王古今同姓名錄有晉廬陵太
守王喬仙其太守弟耶而大皋為渡畧見南史乾通五
年記

羨門 司馬相如傳注羨門偃石山十仙人羨門高也
問竒音延則此仙居羨道也

車子侯 漢武帝與奉車子侯登泰山封禪後暴卒奉
車者官也子侯者小侯也霍去病之子仙傳因誤為車
子侯曰扶風人漢武帝稍遷其位至侍中一朝仙去其
誤如此

洪崖有二 郭璞詩所稱者姓張或云黃帝之臣伶倫
也又云神農師堯時已三千歲矣漢武時入華山尋其

叔叔卿真誥云洪崖先生今為洞真其隱跡在豫章西山洪井在伏龍山宋人畫跨白驢衣紅蕉葛衫從者五人曰橘栗木葛拙負六角扇垂雲笠方木鐙二玄書此張蘊也筆叢以為唐張氲號洪崖子世多以堯時之洪崖姓張亦猶金華之皇初平號赤松子而劉孝標遂以金華赤松子為雨師初平之兄初起亦改名魯般

罔象方相罔像仿像稍異 周禮方相氏掌逐疫鬼作罔像莊子失元珠問罔象孔叢子水石之怪龍罔象又

晉書載紀劉元海傳仿象相符杜甫漢陂詩仿象識鮫
人郝氏以為罔象即仿象方相智按方相即俱頭也因
彷彿罔象而名之荀子曰面如蒙俱南史沈雲禎傳葬
不須輜車靈舫俱頭也孫恂收顛側魁而無俱蓋一字
也恂偶遺耳成式曰傲一名蘇一曰狂阻一曰觸墮費
長房識李娥藥丸謂之方相腦

罔兩作方良罔窳罔閭罔蝮魍魎 左傳螭魍罔兩通
作方良見禮注張衡東京賦斬委蛇腦方良淮南道應

訓南遊乎罔閼史相如哀二世賦精罔閼而飛揚史孔子世家夔罔閼魯語作蚘蚘家語作魁魁

商羊畢方橐𦉑驚水火之怪皆如鳥一足尸子木之精為畢方一作必方淮南注木精如鳥一足方朔所對即此也見則邑有譌火孔子言商羊一足何水火之怪皆一足耶橐𦉑亦如梟一足又山蕭鳥臨海志有獨足鳥聲如人將雨轉鳴是商羊也唐韻曰驚土精也似雁一足黃色薛綜注東京賦魃蠱小兒鬼畢方老父神如

鳥一足銜火作災陳後主時一足鳥集殿以觜畫地成文曰獨足上高臺盛草變成灰

藻兼即藻廉水木之精 見幽冥錄東方朔所言也唐陸勛集異志拾遺記作藻棘各類書作藻廉

甲作拂胄雄伯騰蘭攬諸伯倚彊梁祖明委隨錯斷窮奇騰根十二皆儼神 後漢禮儀志逐疫中黃門倡佞子和曰甲作食馘拂胄食虎雄伯食魅騰蘭食不祥攬諸食咎伯倚食夢彊梁祖明共食礫死寄生委隨食觀

錯斷食巨窮竒騰根共食蠱按段安節樂府雜錄曰甲
作食凶者腓胃食夢者騰蘭食不祥者攬諸食名者祖
盟強梁食其磔死寄生者桃根食虎者與柯古所引字
亦微異

倍阿屋東北方鬼 莊子倍阿鮭蠶林膚齊云云道函
作突坵堪坵一作堪陪鮭蠶即白澤之僕龍

忖留橋柱像也 水經注馮翊石柱橋北首壘石水中
舊有忖留神像此神與魯班語曰我貌獐醜御善圖物

容我不出班拱手令出頭以腳畫地置其像于水惟背
以上立水上董卓後焚此橋魏更脩之忖留之像曹公
騎馬見之驚定州張平子事與此同三齊略記載始皇
巧人以腳畫石塘相見之海神怒負約可知附會

聾聵皆漸 張續宣室志曰裴漸隱伊上李道士曰當

今制鬼無如漸耳時朝士書聾于門成式曰元日書門

息瘡辟邪符尾勅聵搜真玉鏡作聾

積斬二音禪
讀你平聲

博物

志漢舊史儼立桃人葦索滄耳虎等聾蓋滄耳也

諾皋太陰神也 段成式云唐乘言諾皋太陰將星神

名有諾皋記甲子曰神曰弓陰入水呼之不溺甲戌神

名執明入火呼之不燒日名張表月名文申雷公江赫

冲電母秀文英風伯方道彰雨師陳華夫俱見道經藝

苑卮言載之此定臆造其字亦多造者如曰鼈生丙戌日鬼

也天陪乙卯也耳述戊午也遼壬戌也迺辛丑也聶左乙酉也天

雉丙辰也懋辛卯也髮廷迺酉也挺彊丙午日也智謂呼皋復而應

諾故取以為陰神之名

青女 淮南曰秋三日青女乃出降霜雪高誘曰青腰
玉女生霜雪梁昭明曰青女司寒杜詩飛霜任青女翟
公巽詩青女霜如失黃人日故遲王道俊曰玉歷祥異
賦云外國之入貢也若黃人守日而立

郭禪竈神 見後漢陰就傳無功引之智按其祖陰子
方以黃羊祀竈章懷注竈神名禪字子郭不言姓郭杭
州刻本草作陰子萬誤矣元瑞云竈神姓張名單字子
郭夫人字卿忌一曰竈神名壤子廣濟歷曰伏龍莊子

竈有髻

侯囊兩山之間鬼如小兒諸葛恪引去故地即死

糞而述秦文公時獵得獸若彘二童子曰此名糞而

述糞而述亦曰二童子名寶雞得雄者王得雌者霸

巫支祈水神岳瀆經言禹導淮獲巫支祈似猴李肇

曰楚人得古鐵鎖青猴即山海之無支奇陳水南言泗

州龜山寺井鎖水母即毋支祈弘治十六七年有水怪

曰趕浪曰神木殆即此

羽家金永之子 見歸藏啓筮淮南作羽嘉

宰一作幸 直翁引莊山有宰智謂以宰安名而訛

夔魑猶狂耗鬼惡鬼也 甘泉賦捎夔魑而扶猶狂魑

音虛猶音橘

犁醜小人國之靈鬼也 山海經小人國有神人面獸

身曰犁醜之尸道函有离竈道昭載觀觀

黔羸造化神名 遠遊曰召黔羸而見之今為余先乎

平路白澤云陰陽變化之精曰岱委摯虞賦用黔雷

羸疑

訛音羸之

大沈久湫河神也 秦惠王祀巫咸久湫亞駝所謂詛
楚三文也久與故通

苑窳蠶神也 見漢舊儀婦人寓氏公主凡二人曰公
主尊稱之也

語忘敬遺主婦產 柯古曰婦產呼之不害二鬼長三
寸三分上下烏衣

折丹山海經神名 術士呼東風符用之相傳日本有

此法梵書有真丹徐鍔四六龍持貝葉亟傳摩竭之誠
象負蓮花遂滿真丹之境摩竭魚莊飾門柱也真丹震
旦也古聖帝時通荒外之事安知折丹非真丹之語存
疑

俞兒即蜚虵 管子言俞兒見者霸御覽引俞而莊子
王子敖告齊公以委蛇即此事博物志澤有委蛇短轂
長轅見者霸特易其名耳詳見諷語

鳧 無功引山海經女和月母國有人曰鳧按胡文煥

百家名書本作鳧郭璞音婉

游光伯強皆厲鬼 風俗通以游光為厲鬼名魏志謗
語曰李豐兄弟如游光向不得解觀此便知天問伯強
大厲鬼也疑即伯倚強梁二名為一

靈霍蜚廉屏翳宋裴異解 淮南子季春三月豐隆乃
出雷師也應劭曰雲師韻會作靈霍水經作封隆西京
雜記雲師曰屏翳呂覽曰屏翳雨師蓋雲興即雨也古
師與帥通轉乃一字後人分之耳風俗曰雨師為玄冥

風伯為蜚廉即飛廉元美引孟婆風姨河圖書曰大伯
下為雨師熒惑下為風伯遁甲開山圖有宋翬即雨師
二字

頊天竺笙依倚後帝卑皆廁鬼 雜俎曰頊天竺廁鬼
也一名笙白澤圖曰故溷之精曰卑如女持鏡呼之使
人知愧又曰廁精名依倚異苑曰廁精曰後帝陶侃嘗
見之

曰蛟曰夔曰揮曰金累皆山精也 抱朴子曰山精如

小女曰蛟呼之即不敢犯一曰超空又曰山精如鼓一

足曰揮又衣裘帶笠名曰金累如龍曰飛龍玄中記山

精食三蟹千歲蟾蜍食之白澤圖曰山精名夔百歲狼

化女曰知火精曰必方

按即畢方

木精曰樟侯

即異苑陸敬叔所言之彭

侯木中蟲曰賈

與地下犬名同

金之精曰蒼如豚使人不宜妻

水之精曰罔極象如小兒赤色可烹故門之精名野如

朱儒見人則拜呼之宜飲食故宅之精名揮文又曰兩

貴故廢墓之精曰元如老役夫又名狼鬼又有山冕如

蛇兩頭呼之可使取金銀故道徑之精名忌呼之不迷

澤鬼曰慶忌道之精名作器故池之精名意又名髡頓

井之精名觀

按襟俎曰井鬼名瓊

故市精曰毛門室精曰傒龍堂

下被髮曰溝顧愷啓蒙記曰玉精曰委如女青衣桃戟
刺之可得元中記曰玉精為白虎金精為車馬銅精為
僮奴鉛精為老婦柯古載蛇鬼曰側石圭一名塵馬鬼
名賜衣服鬼名甚遼側即刺

天孫召魂 博物志曰援神契云五岳之神堅四瀆之

神仁太山天帝孫也主召人魂白虎通曰軫星逐鬼張
星拘魂東井還魂也王子季曰融皋山上有翻魂即返
魂也稚川有太乙召魂魄丹卒死三日折齒內一丸即
活

靈笈七籤與龍魚河圖諸神名皆臆造也 黃庭內經
曰髮神蒼華字太元腦神精根字泥丸眼神明上字英
元鼻神王壘字靈堅耳神空閑字幽田舌神通金字正
倫齒神皓鋒字羅干心神丹元字守靈牙神皓華字虛

成肝神龍煙字含明腎神元冥字育嬰脾神嘗在字魂
停膽神龍曜字威明龍魚河圖曰髮神壽長耳神嬌女
目神珠映鼻神勇盧齒神丹朱夜卧當呼之藏經心蟲
名斑駁七籤曰司命曰發紐目神曰虛監舌神曰始梁
九關魂名曰綠道河圖又曰秦山圓常龍衡山丹靈峙
華山浩鬱狩恒山登僧嵩山壽逸羣泰山將軍唐臣衡
山將軍朱丹華山將鄒尚恒山將莫惠嵩山將石元東
海馮脩夫人朱隱娥南海視赤夫人翳逸寥西海勾太

丘百夫人靈素簡北海禹帳里夫人結連趙汲冢曰蓐
收居岍山而太公金匱所言四海之神即祝融玄冥五
帝也注疏引東方靈威仰南方赤熛怒中央含樞紐西
方白招矩北方叶光紀典略曰虛主刀名大房熒惑主
矢名防隍角主弓名曲張作典張者誤張主弩名遠望參主
戟名大將戰時細祝之或以五日作赤靈符著心前或
丙午月作龍虎三囊符太公又載刀神脫光箭神續長
矛神跌蹠河圖曰斧神狂章春秋佐助期云司弓弩神

曰推亡水經注云皋通神人能治弓弩類山戴鏡神紫
珍筆神佩阿佐助期又云麥神福集黍神併佞蘭郝豆
神靈趙姓藥無功作靈殖湧幢小品云善睡之神曰宜
楸

三彭三姑三尸猶三蟲三毒也庚申表西殺也 酉陽
雜俎上尸青姑伐人眼中尸白姑伐人五臟下尸血姑
伐人胃命凡庚申日三尸言人過玉函祕典上尸彭琚
小名阿呵中尸彭瓊小名作子下尸彭璠小名季細守

尸之鬼曰破射元科三尸甲寅遊手剪手爪甲午遊足
剪足甲藏經言三蟲兩鼠之類也柳宗元有罵尸蟲文
皮日休白樂天皆守庚申許渾詩年長每勞推甲子夜
長初共守庚申道士程紫霄曰任汝三彭說是非皮白
何惑乎文人滑稽自娛耳

通雅卷二十一

欽定四庫全書

子部

通雅卷二十二
三

詳校官中書臣朱文翰

員外郎臣牛稔文覆勘

總校官降調編修臣倉聖脉

校對官中書臣高 中

謄錄監生臣施 銑

欽定四庫全書

通雅卷二十二

明方以智撰

官制 仕進

辟舉猶古之興吐也 宰夫書其能者與其良者以告
于上卿大夫三年則大比考其德行道藝而興賢者能
者禮賓之遂大夫大比帥其吏而興吐鄭司農曰興賢
若今舉孝廉興能若今舉茂才也漢高帝詔其有意稱
明德者必身勸為之駕遣詣相國書行義年文帝二年

舉賢良方正直言極諫者武帝建元亦舉丞相綰奏罷
之昭宣元成皆舉賢良直言茂材異等後漢每因日食
災異或初即位輒詔舉士而孝弟力田自高祖舉為三
老惠帝舉者復其身高后元年初置孝弟力田二千石
者一人文帝十二年以戶口率置三老孝弟力田常員
武帝嘗遣存問賜帛元封六年舉獨行君子詣行在所
元光元年初令郡國舉孝廉各一人又舉有道至孝延
平中舉隱士建初辟士四科一德行二學通三明法四

多略公府亦以此辟士光祿四行即以此第其卽從官也魏州郡皆置中正以選舉劉毅言其弊晉太始舉賢良方正直言又舉異行其秀孝則策試之隋詔以志行修謹清平幹濟二科舉人唐賢良方正直言皆制舉試之中者稱及第貞觀十七年舉孝廉茂才異能開元設直言極諫科其舉選不由館學者謂之鄉貢州縣試已至省疏名結款通保由戶部集闕而關於考功試之開元寶應貞元皆舉孝弟力田宋乾德三科亦舉賢良經

學吏理然皆吏部試策論三道開寶舉孝弟德業嘉祐
舉行實隆興舉逸民廉吏世降化薄辟舉亦屬黃緣特
異亦藏詭偽瑣闈執簿猶呼盧耳所教非所用矣偃風
勉善自得其真蘇軾曰舉孝廉則勇者割股怯者廬墓
此文人之偏詞欲造舟而先憂溺人耶科目里選並行
而徵聘間舉總在君相類物情而鼓舞之胡瑗分齋教
學安石積驗法有寔行者乎周宣幹欲罷三十年科舉
痛其積習也末世治以例而教學不講即使破格徒為

奸資誠使取士先以文學但優而不用必德行特聞始
行辟舉得為吏如此則士益其修文行兩取庶于資格
少差耳

漢有甲乙丙科射策者以應令為中 蕭望之以射策

甲科為郎注師古曰謂為難問疑義書于策量為大小
書甲乙之科列而置之不使彰顯有欲射者隨其所取
得而釋之以知優劣射之言投射也對策者顯問以政
事觀其文辭定高下也匡衡以射策甲科不應令除為

太常掌故褚先生曰數射策不中至九中丙科兒寬以射策為掌故馬官翟方進何武王嘉竝以射策甲科為郎房鳳以射策乙科為太子掌故名信臣以明經甲科為郎儒林傳平帝時歲課甲科四十人為郎中乙科二十人為太子舍人丙科四十人補文學掌故光武時顏氏博士缺試策第一拜博士永元十四年徐防疏博士及甲乙策試宜從其家章句開五十難以試之論語不宜射策詔從防言李巡以為博士試甲乙科爭第高下

更相告言乃刻石經爭者用息順帝陽嘉元年增甲乙
科員由師古注論之今嘗以射策為對策者非矣余以
為量為大小列而置之隨人欲射之說恐未必然或似
今出題試法耳撫言且言題于几上令士人以矢投之
此說尤非

唐有六科二科九科四科 六典載六科一曰秀才二
曰明經三曰進士四曰明法五曰書六曰算試秀才置
進士科始于隋至唐初秀才最高貞觀中有舉而不第

者坐其州長由是廢絕士族趨向惟明經進士二科而進士為尤重帖經及試雜文則調露二年從劉思立之請也顯慶五年詔五品以上四科舉人一德行二經史三詞藻四廉直肅宗乾元御宣政殿試四科舉人宣宗大中十年奏見置科目開元禮三禮三傳三史學究道學明法書算童子等九科通典曰明經雖有甲乙丙丁四科進士有甲乙二科自武德以來明經惟有丁第進士惟乙科而已進士試詩賦時務策五道帖一大經全

通為甲第策通四帖過以上為乙第及第綴行通名詣
主司謝乃叙齒赴期集又有曲江會題名席紅綾餅餤
所謂衣骨皆香李贊皇言臣祖登第後家不置文選朝
廷官須公卿子弟以少習其業自熟朝廷事也當國時
奏設科取士而附黨背公自為門生自今一見有司而
止其期集參謁曲江題名皆罷其曰別頭試者唐禮部
侍郎親故移試考功謂之別頭貞元十六年高郢奏罷
之變曰帖紙令論一經義為帖括

宋乾德置三科太平興國八科景德六科天聖十科紹興復元祐十科又定兩科 乾德二年詔置制舉三科一曰賢良方正二曰經學優深三曰詳嫻文理開寶六年御講武殿覆試進士宋準等御試舉人自此始以詩賦取士自開寶六年至嘉祐八年凡三十六舉興國二年御殿覆試禮部合格八科舉人得九經一人開寶通禮四人三禮八十人三傳五十三人三史三人學究四十一人明法十四人凡百九十六人並賜本科及第其

九經五經七人不合格亦賜同三傳出身唐進士每歲三十人咸亨上元增七八十人尋亦復故比興國幾五百人又未命官而賜綠袍鞞笏淳化三年加論一道以三題為準又詔律賦依平仄用韻殿試糊名祥符四年晁迥定禮部貢院條制上發解進士條制天聖元年定科場條貫景德復六科賢良博經才識吏理韜畧邊寄等科也天聖十科加書判拔萃科又置高蹈丘園沉淪草澤茂材異等共十科也并許白衣舉人紹興二年以

朱勝非請復元祐十科乃司馬光所請者十五年分經
賦為二科進士賜御詩袍笏聞喜宴自興國二年始唱
名自雍熙二年始廷賜袍笏自祥符元年始糊名始淳
化而諸州糊名自明道二年始易書大子祥符而諸州
易名自景祐四年始廷試不黜始于嘉祐二年三歲一
舉始于治平四年宋經義詞賦更為廢興已合為一又
分為二溫公盡變安石法惟經義取士不變甚是紹聖
初年令進士純用經義而改置宏詞一科于進士登科

後試之取不過數人即今之館選也元仁宗始從李孟之請制三歲一開科八月郡縣鄉試明年二月會試中者策之于廷賜及第出身有差即今制也但彼以蒙古色目為右漢人南人為左各命題耳

登名上聞也 史記周紀武王曰維天建殷其登名民三百六十夫亦見周書隨巢子司馬貞曰登進名賢之人猶言升聞也如淳引呂氏春秋曰魏文侯勝齊天子賞文侯以上聞樊噲傳破李由軍賜上聞爵晉灼曰名

通于天子也

新士新試士也

王制論秀士升之司徒曰選士升之

學曰俊士皆曰造士告於王升之司馬曰進士學記中
年考校周禮曰大比此猶之試士也夏官司士故士注
曰故為士者疏曰新升試士未得正爵者為新士

重試曰覆試

舊說武后覆試崔沔第一覆試自此始

唐志高祖詔諸州明經秀才俊士進士縣考試州長重
覆歲隨方入貢此唐法也漢左雄議舉士先試之公府

又覆之于端門張成除此科黃瓊言覆試之作將以覆
虛實濫不宜改革則漢已有覆試事矣乾德六年詔舉
人有父先食祿者覆試紹興于後省覆試今童生猶覆
試鏤廳彌封糊名謄錄皆詳于宋而後因之吳康齋見
搜簡歎曰辱士至此遂出天順中李賢薦徵為春坊辭
歸豈可以尹蹇齋之吹疵而抹殺哉

漢有童子郎唐宋開童子科 漢左雄奏汝南謝廉河
南趙建年十二能通經拜童子郎臧洪十五拜童子郎

黃琬以公孫拜童子郎梁天監七年岑之敬十六擢高第除童子奉車郎唐志十歲以下能通一經及孝經論語誦文十通者予官通七者與出身員半千裴耀卿王丘皆擢童子科李泌楊炯則舉神童矣淳化二年賜泰州童子譚孺卿出身雍熙得楊億咸平得宋綬景德得晏殊仁宗時童子賜出身者十人寶元罷天下舉念書童子高孝時皆有童子求試而受官者今則試秀才例稱童生而已景泰中李東陽六歲名見書龍鳳龜麟字

八歲試益稷篇

打毘毘下第也

李肇國史補曰進士為時所尚久矣

其都會謂之舉場通稱曰秀才投刺曰鄉貢得第謂之前進士互相推敬謂之先輩俱捷為同年有司為座主京兆府考而升者為等第外府不試而貢者曰拔解將試自保曰合保羣居而試曰私試造請權要曰關節激揚聲價曰往還既捷列名慈恩寺曰題名會大宴於曲江亭曰曲江會籍而入選曰春闈不捷而醉飽曰打毘

耗匿名造謗曰無名子退而肄業曰夏課挾藏而入曰
書策打罷耗見地理志即打眊聒也

覓舉梯媒言關節也 薛登曰方今舉士詔下陳篇希
恩奏記誓報俗號舉人皆稱覓舉禮部采名故預投公
卷柳宗元上權德輿溫卷後周寶儀請進士省卷納五
軸以上崔邰試士吳武陵以杜牧阿房賦予之請以第
一人處牧之錢徽不聽段文昌李紳託而貶蘇軾以題
致李廌而為二章得可見科場采名或以關節買舉自

昔然矣陶九成言關節謂之梯媒

初登第有燒尾宴大臣獻食亦曰燒尾 大臣拜官獻
食天子曰燒尾蘇瓌獨不進韋嗣立趙彥照崔湜轉官
中宗皆令于興慶池燒尾邵氏聞見錄士人登第必展
歡宴謂之燒尾說曰虎化人惟尾不化須得燒去又曰
新羊入群須燒其尾又曰魚化龍必有雷火燒其尾唐
太宗問宋子奢燒尾事以燒羊為對石林燕語亦莫能
折衷也筆叢作朱子奢

淡墨氈書貢院榜也 撫言進士榜用黃紙以淡墨氈書禮部貢院四字於首賈公談錄云李紆侍郎放榜未填榜首四字疾命吏士袒袒善書時醉以氈筆染不能加墨迨明方覺字體濃淡相間反致其妍後遂為故事後漢始有選部晉有選例梁有選品唐有三銓有小選東選南選乾德參選雍熙置三班院元豐定四選紹興編七司例冊 漢成帝建始初置尚書有常侍曹主公卿事又有二千石曹掌郡國二千石後漢始改為吏曹

主選舉祠祀尚書令總之後又為選部靈帝以梁鵠為
選部尚書魏改選部為吏部陳蕃為光祿勳與五官中
郎將黃琬共典選舉疏曰陛下宜擇從忠善尺一選舉
委尚書三公呂強疏曰舊典選舉委三府三府有選參
議掾屬咨其行狀若無可察然後付之尚書今但任尚
書或復敕用蓋漢時尚書官小也晉李胤刊定選例而
著令王戎領吏部始為甲午制劉宋大明中分吏部尚
書置二人齊和帝時梁武帝表大選部天監中徐勉撰

選品唐六典曰三銓曰尚書銓中銓東銓四事曰身言書判三類曰德才勞凡流外兵部禮部舉人郎官得自主之曰小選太宗時以歲旱穀貴東人選者集于洛州謂之東選高宗時以嶺南五管黔中都督府得即任土人而官或非才乃遣郎官御史為選補使謂之南選吏部員外郎掌選院謂之南曹長安志選院在尚書省南選人看榜處乾德二年詔流內銓聽四時參選不俟冬集雍熙四年置三班院供奉官殿直承旨為三班嘉祐

從三班院于文思院西志曰三班院文臣兩制以上武
臣諸司使以上掌之元豐五年吏部分選有四文臣自
朝議大夫大理正以下非教授者歸尚書左選武自皇
城使以下非宣授者歸尚書右選自初仕至幕職歸侍
郎左選自監掌至供奉官歸侍郎右選神宗謂三代兩
漢無文武之別故命蘇頌定之紹興四年詔吏部編七
司例冊淳熙修七司法紹興十九年上吏部續降七司
通用法續降者續降朝旨也愚者曰漢襲秦郡縣猶有

封建意守令自用其屬而吏皆上達耳目親而試之明
故漢最得人自隋奪天下權予吏部責一手知天下人
才公者執例而已崔銑胡世寧高束陳建之議宜寫一
通以進

注擬選冊也 山濤每缺啓擬後因大品格注其人才
以四事三類定其留放謂之注擬唐三品以上冊授五
品以上制授六品勅授皆由尚書省奏擬

厭唱選人受注而唱名也 唐法五品以上不試上名

中書門下六品以下始集而試觀其書判已試而銓察其身言已銓而詢注其便利已注而唱下厭者得反通其辭三唱而不厭聽冬集

過官過門下省也 故事三銓三注三唱而後擬官季

春始畢乃過門下省猶今之過堂也楊國忠兼文部尚書密定員閣於都堂試唱于是門下過官三銓注官之制皆廢奏受具題也 厭者為申上于僕射乃上尚書有給事中讀之黃門侍郎省之侍中審之然後以聞主

者受旨而奉行焉謂之奏受按今文選單月急選雙月
大選掣籤於棕棚具本曰題其私情或陳諫則曰奏奏
本長題本一寸吏部掣籤選官始于太宰關中孫公丕
揚後遂踵之

凡拜官則給告身 唐制拜官之日即給告身其人先
輸朱膠綾紬價方准書給大將軍告身一通止易一醉
此猶今之空頭劄也唐選舉志曰三銓注擬奏受視品
及流外則補皆給以符謂之告身此似今之文憑于文

定謂告身即今之告勅也宋之制亦然每至宣麻誕告鎖院演綸詞頭以下外人未知其密且重如此

漢有課第有功次魏有都官考課法晉有九班制元魏有勲書唐有考簿宋有磨勘漢選部猶周官司士也三歲稽士任而進退其爵祿猶後世之考功也漢御史中丞總領州郡奏事課第諸刺史刺史課郡國二千石郡又課縣兩府九卿雜考郡國之計天子受相國之要光祿第郎從官孝元使尚書選第中二千石選第猶課

第也課其殿最也其曰連最連稱最也功次計功幾次也兒寬為掌故功次補廷尉文學卒史馮奉世為郎功次補武安長薛恭本縣孝者功次稍遷衛綰為郎功次遷中郎將是也尤異最尤異也魏明帝詔散騎常侍劉劭作都官考課七十二條晉九班制劉頌為吏部尚書所建杜預受詔為黜陟之課略曰末世疑心而信耳目疑耳目而信簡書漢刺史歲終奏事不制算課而清濁粗舉魏氏考課即京房遺意失于苛細以遺大體故歷

代莫能通也詔書以考課難成聽通薦例卒不行矣元魏朝堂黜陟郭祚奏景明考格盧同為左相閱吏部勳書檢覈竊階者三百餘人唐考功差以九等叙以四善外有二十七最貞觀歲定京官望高者二人分校京外官考給事中中書舍人各一人蒞之考功郎中判京官員外判外官考故事考簿朱墨咸通王徽建議以墨其六條黜陟則遣使行也唐虞九載魏晉以後六周唐因隋為四又減為三考宋以三年為滿四朝志曰考功以

七事考監司以四善三最考守令淳化四年以考校京朝官為審官院幕職州縣官為考課院旋以考課院歸流內銓祥符九年磨勘京朝官天禧詔審秩及三年審官院磨勘嘉祐有考績新書磨勘以中丞學士典領紹興舉薦按察四條沈該劾司馬光所請也

年勞遷叙也 唐志凡居官必四考四考中中進年勞一階叙凡年勞歲一叙給記階牒宋立月限考滿即遷即年勞也

書考自書其課迹也 宋太宗罷歲月序遷之制欲修
唐制書考之事興國六年詔京朝官釐務于外者咸給
御前印紙令書治迹雍熙四年知州通判給御前印紙
書課績

曰流內者自隋始曰流外者自唐始 隋置九品品各
有從自四品以下每品分為上下凡三十階自太師始
焉謂之流內流內自此始又置視正一品至九品品各
有從自行臺尚書令始焉謂之視流內自此始唐因隋

制又置視正五品視從七品以除薩寶及符被正謂之
視流內又置勳品九品自諸衛錄事及五省令史始焉
謂之流外自此始劉祥道言歲入流千四百人欲歲定
為五百人魏元同言諸色入流歲以千計曰流外者猶
今言未入流也

假版班品之卑者 陸機表注凡王封拜謂之版官即
漢尺一版拜用之遺也隋官志曰陳有版咨議參軍版
長史之類晉華譚傳謹奉還所假左丞相軍咨祭酒版

晁錯言里有假士連有假五百五百師名也邑有假侯
後志有軍假司馬趙充國從貳師班超從竇固皆假司
馬似今之劄付官晉立行臺之時所在承制拜封皆假
官也

官京師曰京官常參曰升朝官 京朝官蓋有分別陸
務觀曰唐自相輔以下皆曰京官常朝曰常參官宋初
以常參預朝謁曰升朝官元豐以預宴坐曰升朝官合
之則曰京朝官

抹階辭免除授之故事也 學士院辭免除授賜詔皆留其章葉石林曰今降批表院中用紙連其章後書省表具之字必長作表字傍一瞥通其章階立上謂之抹階使不復用舊銜意

以他官兼曰貼職 史館昭文館集賢院為三館皆寓崇文院直館直院謂之館職以他官兼者謂之貼職劉禹錫集荆門縣記云禹錫方以郎位帖職于計臺帖職字當始此元吏房三科三曰貼黃今奏本約其事曰貼

黃而清黃則兩選核黃封也

官制爵祿

漢賜民爵唐曰賜民古爵宋賜高年爵 大事記普賜
天下民爵自惠帝始後漢書注劉劭爵制曰春秋不更
庶長已見商鞅修其法品為十八級合關內侯凡二十
等百官表曰爵一級曰公士二上造三簪長四不更五
大夫六官大夫七公大夫八公乘九五大夫十左庶長
十一右庶長十二左更十三中更十四右更十五少上

造十六大上造十七車庶長十八大庶長十九關內侯
二十徹侯避武諱曰通侯賜爵自公士以上不得過公
乘賜爵者有罪得贖貧者得賣與人高紀詔曰民各歸
其縣復故爵又曰七大夫公乘以上皆高爵也異日秦
民爵公大夫以上令丞與抗禮今吾于爵非輕也其令
諸吏善遇高爵于文定言漢賜民爵不知其制智按唐
劉知幾所陳海內具僚九品上每歲賜赦必賜勛階至
于會宴緋服多于青衣象版多于木笏可見其濫蓋庶

官普加階級而不及平民與漢異宋遇郊赦普賜恩階所及雖多而時頗希闊與唐亦異于文定言唐宋無賜民爵事殆未考耳智按唐高宗紀乾封元年封禪改元中宗神龍元年祀明堂大赦玄宗天寶八載謁太清宮大赦德宗大厯十四年即位大赦皆賜民古爵宋端拱元年賜高年百二十人爵為公士開寶中澶密等州民年八十以上賜爵公士咸平五年賜京城父老百十九歲祝道岳爵公士祥符三年賜祥符等縣年八十以上

者爵公士祥符二年以天書降賜爵王伯厚曰秦漢以後不復賜民爵自藉田禮成端拱詔始復賜焉智按魏文帝黃初元年賜天下男子爵人一級三年立皇后賜爵二級明帝太和元年賜天下男子爵人二級青龍元年亦然則魏猶踵故事也文定所言漢賜民爵不知其制智亦疑之疑天下民盡賜爵立社稷即位皇太子改元恩詔重複則幾無百姓矣常見漢詔賜高年帛又因宋賜民爵必以高年乃始較然于漢詔所稱民殆鄉老

或里長之謂乎猶今之耆民壽官也其公乘以下觀高
帝詔令諸吏善遇高爵則公士等猶夫民耳即漢詔所
云久立吏前曾不為沒也特用以贖罪而已惠帝元年民
有罪得賣爵三十級以免死罪應劭曰一級值錢二千
凡為六萬若今贖罪入三十疋練矣六年令民得賣爵
入粟拜爵晁錯之議也六石為上進稍增至四千石為
五大夫各以多少級數為差景帝時修賣爵令裁其賈
以招民武帝置武功爵食貨志曰級十七萬凡直三十

餘萬金是何其貴也又何不分上下之等豈造士與軍衛同價乎劉氏曰級為十七行萬字也臣瓚曰茂陵中書有武功爵一級曰造士二曰閑輿衛三曰良士四曰元戎士五官首六秉鐸七千夫八樂鄉九執戎十政戾庶長十一軍衛則止十一級楊僕傳以千夫為吏功臣表陸量侯須無曾孫秉鐸聖灌嬰曾孫官首匿皆武功爵也魏志建安二十年始置名號侯爵十八級關中侯十七級皆金印紫綬置關內外侯十八級銅印龜紐墨

綬五大夫十五級銅印環紐墨綬皆不食租與舊列侯
關內侯凡六等以賞軍功裴松之以為今之虛封蓋自
此始爵曰不更言不更卒也後左右中更言用更卒也
簪裏舊注御駟馬者騶裏古之名馬也駕駟馬者其形
似簪智不謂然蓋導加冠曰簪以組帶馬曰裏也考洪
武時曾賜民爵里士鄉士

周五等漢用其二魏凡六等晉五等唐九等宋五等明
用三等漢二等爵魏咸熙元年建五等爵晉立五等

有大國次國小國郡公郡侯自魏黃初三年制封王之庶子為卿公嗣王之庶子為縣侯公侯之庶子為亭伯晉泰始二年詔曰本為縣侯者傳封次子為亭侯為卿侯為關內侯皆食本戶十分之一唐百官志司封凡爵九等一曰王食邑萬戶正一品二曰嗣王郡王五千戶從一三曰國公三千戶正二四曰開國郡公二千石從二五曰開國縣公千五百戶正三六曰開國縣侯千戶從三七曰開國縣伯七百戶正四八曰開國縣子五百

戶正五九曰開國縣男三百戶從五通典并云其上加實封者仍給租庸凡封戶三丁以上為率歲租三之一入朝廷食實封者得真戶分食開元勅諸食實封並以三丁為限開元十年詔宰相共食實封三百戶以七丁為限堂封自此始將帥封王自天寶九載始宋用五等以勲階進明朝封爵止公侯伯三等而位俱在一品之上異姓王但有追封而已

景風紹封以夏封也 和紀永元詔曹相國後容城侯

無嗣求近親宜為嗣者須景風紹封以章厥功注春秋
考異郵曰夏至四十五日景風至則封有功三王世家
因盛夏吉時定皇太子位月令立夏之日封諸侯下邳
惠王行傳注和帝賜彭城王恭詔差次下邳諸子上名
將及景風拜授印綬馮異傳安帝詔二十八將絕世者
分別署狀上將及景風章叙舊德盧植規竇武曰准之
前事將有景風之祚

餐錢月奉也 高后紀列侯幸得賜餐錢奉邑注餐錢

賜厨膳錢也奉邑本所食邑也周禮太宰注祿若今月奉疏曰古者祿皆月別給之漢之月奉亦月給之古制祿不計錢陸贄曰三代以食人衆寡為差兩漢以石數多少為秩史記燕噲自三百石吏以上而効之以石計祿始見于此後百官志百官受奉例大將軍三公奉月三百五十斛遞減至佐史月八斛凡諸受奉半錢半穀外戚傳俗華秩視真二千石汲黯傳以諸侯相秩居淮陽注如淳曰律真二千石月百五十斛歲得千八百石

是石與斛之數無殊石即斛也然則量數百五十斛以名祿則曰千八百石猶有古制祿不計錢之遺意晉有官表注曰漢延平中二千石奉錢九千米七十二斛真二千石月錢六千五百米三十六斛則漢百官俸米多錢少于此可見其數減于前漢者後漢裁之也古時大臣祿賜甚厚既有國土而賜予動千萬如黃金百斤其常也開元二十四年定百官俸一品月三十千遞至九品月一千九百餘大曆十二年加京官俸三公宰相

每月各一百二十貫又有職分田一品歲七百石自會
昌以後三師二百萬三公一百六十萬侍中百五十萬
令僕百四十萬尚書御史大夫一百萬節度使三十萬
此計一歲而言也一萬當為十緡二百萬則為二千緡
矣宋乾德置俸戶祥符五年加職官月俸三師三公百
二十貫此與大厯相近北漢劉崇以太原建國宰相月
俸百緡乃今一統宰相月俸猶不能半鄭端簡曰祿涼
于宋而蠲復之恩科愈厚至推三代一如見爵則千古

曠絕之恩矣宋元封贈大父母降父母一等封贈父母
降本身一等

斗食祿少也 通典斗食太常明堂員吏至雒陽令員
吏月十一斛斗食差優於佐史佐史月八斛秦范雎曰
自斗食以上有非相國之人者乎王剪歸斗食以下秩
薛宣傳為大司農斗食屬師古曰斗食一歲不滿百石
寄祿官猶今之勛階也 夢得曰制寄祿官銀青光祿
大夫與光祿正議中散朝議皆分左右朝議中散有出

身人皆超右其餘並以序遷宋太祖階級法曰一階一級全歸伏事之儀續演繁露曰政和三年勅特進至承務郎為寄祿官承直郎至迪功郎為階官蓋元豐時未分寄祿與階官故人以非職官為階官近制則以特進正尹少尹為勳以大夫郎為階而無寄祿例

霍料幕府官俸也 松陵唱和皮日休云酒坊吏到常先見霍俸符來每探支注云吳都有霍料宋景文祁筆記不知鶴料王洙李淑皆不知按墨莊漫錄曰曾文彥

知滁州有和表弟西齋詩寧羨一囊供雀料會看千里
躍龍媒注云唐幕府官俸謂之雀料

通雅卷二十二

欽定四庫全書

通雅卷二十三

明方以智撰

官制 文職

三名公卿大夫也 周禮疏引易通卦驗云天地成位
君臣道生君有五期輔有三名注公卿大夫也政教君
臣起自人皇之世至伏羲因之故文耀鉤曰伏羲作易
名官者也

黃帝有五官九工少皞五正唐虞有六官九官 史記

黃帝建立五行于是有天地神祇物類之官是謂五官
管子呂覽皆言黃帝五官以正人位文選王融策文九
工開于黃序注黃帝也雲官有五人有同德四人合為
九少皞五正見于蔡墨之說五行正也通典堯置天地
四時之官為六卿舜為六官以正天地四時說苑曰堯
時舜為司徒契為司馬禹為司空稷為田疇夔為樂正
倕為工師伯夷為秩宗皋陶為大理益掌啟禽為九職
劉向傳舜命九官濟濟相讓注禹司空棄后稷契司徒

咎繇士垂共工益虞伯夷秩宗夔典樂龍納言周禮疏
曰堯舜官號稍改其時官名益曰稷曰司徒是天官稷
也地官司徒也又云命羲和仲叔使分主四方注仲叔
亦羲和之子堯既分陰陽四時又命四子為之官掌四
時者字曰仲叔則掌天地者其曰伯乎是有六官分命
仲叔注云官名益春為秩宗夏為司馬秋為士冬為共
工通稷為司徒是六官之名鄭玄分陰陽為四時者分
高辛時重黎之天地官使兼主四時耳共工注水官也

堯天官為稷又司徒士此三官是堯時事舜述前功秩宗舜時官也惟無夏官之名夏傳曰司馬在前則羲叔為夏官是司馬也鄭玄曰初堯冬官為共工舜舉禹治水堯知其必成功故改命司空以官名寵異之非常官也禹登百揆之任捨司空之職為共工與虞垂益是也始羲和之時主四岳者謂之四伯後分至八伯堯初天官為稷至試舜謂之百揆舜命禹為之即天官也崔靈恩曰舜改地官為司徒秋官為士冬官為司空春官秩

宗

五官配五行也

自黃帝建立五行少昊五鳩氏顓頊

立五行之官唐虞百揆四岳象天之有五行也孔穎達
周官疏曰百揆一人四岳內典四時之政四人也孔平
仲則謂四岳為一官俱是縣擬曲禮曰天子建天官先
六大次五官注此蓋殷時制呂氏曰殷人尊神即堯命
羲和舜齊七政洪範首五行之意也其實唐三代皆有
六官皆有九卿考工記疏六官之記可見者堯育重黎

之後羲和及其和叔四子掌天地四時夏書乃召六卿
商周稍改職名六官之數則同通典曰夏制九卿殷因
亦如之三少六官也智嘗論六宗之名與二腎之說以
為凡數五即有六五為生數之宗六為成數之始從一
至十五六固天地之中數也如五禮即有六樂五音即
有六律五運即有六氣皆自然之理東曰青龍南曰朱
雀西曰白虎北曰玄武武者龜與蛇也木曰勾芒火
曰祝融土曰后土金曰蓐收水曰玄冥玄冥則少皞之

二子曰修曰熙也人身一心一肺一肝一脾而腎有二
六宮貴神則土有二六氣則火有二蓋土為終水為始
而水火相交水土相成也龍馬言曰六宮之名冢大也
宰制也司徒徒衆也宗伯禮以宗為先司馬兵以馬為
先司寇寇所常防治也司空之空為何物乎堯制司空
之官以寵禹即宰相也漢三公以司空配之猶古意也
商以太宰為前列周并列而重其權益冢宰兼相職而
司空實相位也以五行言之地官為土天一生水則天

與水猶二水也然則司空篇亡非亡也本無職掌以宰相時兼之耳此說甚竒故存之以備論

漢有官簿有儀品魏晉有品令唐有格令宋有班簿有具員安帝詔舉刺史長令相清白救身率下者無拘官簿注謂不拘常牒也後百官志曰班固著百官表職分未悉故依其官簿粗注職分以為百官志注曰百官簿劉昭補志序所云百官就乎故簿是也應劭有漢官儀隋志王隆作漢官解詁胡廣注樊長孫與劉千秋書

曰張平子次述漢事莫能立顧見汲令王文山小學漢官篇足知舊制儀品荀攸撰魏官儀徐宣瑜晉官品晉志又載魏晉官品令後魏志曰晉品令有正無從唐開元刊定職次著為格令宋開寶詔除授京官依朝官例降勅御史臺班簿十日一上中書太宗閱班簿擇近臣舉官慶曆中中丞張方平言臣在翰林見天聖中具員元豐六年李清臣為備選具員十冊此如今之御覽冊也按表少府若盧注引漢品令則漢先有品令之書矣

唐寔錄宣宗命宰相作具員御覽

中臺尚書省東臺門下省西臺中書省也 中臺亦稱
都臺始于漢成置尚書至後漢而權重唐龍朔改曰中
臺都堂居中左右分司都堂東有吏戶禮部三行西有
兵刑工部三行每行四司凡二十四司中書舊有其官
魏晉始謂之中書省北魏曰西臺龍朔亦然光宅曰鳳
閣開元曰紫薇自黃初置監晉因之又置舍人齋通事
舍人四員各住一省曰四戶權傾天下晉孝武來常居

內殿以省官一人司詔誥位在西省因曰西省郎唐中書舍人為文士之極任門下省後漢謂之侍中寺晉志曰給事黃門侍郎郎中俱管門下眾務龍朔改曰東臺光宅曰鸞臺開元曰黃門省給事中加官也隋置吏部給事郎煬帝移為門下之職又有七諫議屬門下煬帝廢之唐武德復置四人貞觀于門下省置起居郎二人即起居注也相沿皆謂之三省曰臺者別稱也謝靈運晉書曰漢尚書為中臺御史為憲臺謁者為外臺曰三

臺蔡邕以侍御史轉持書御史遷尚書三日之間周歷
三臺其曰八座者六典曰後漢以令僕射六曹尚書為
八座今以二丞相六尚書為八座唐不置令也宋齊有
三臺五省謂尚書中書門下秘書集書省元豐制門下
中書增建後省置諫官筆塵曰霍山錄尚書有上書言
其罪者山屏不奏其書後上書者盡奏封事輒使中書
令出取不關尚書可見尚書是士人中書則宦官也及
江左至唐乃以中書尚書列為兩省中書傳命尚書受

而行之則尚書外庭吏也唐之設翰林學士于禁中專掌制命而中書亦少疎矣及元設中書省而以尚書隸之則中書外廷臣也今之內閣則漢之尚書令唐之中書省而司禮中官則漢之中書令也漢制大將軍位三公下及竇憲伐北國還位次太傅在三公之上自是東漢官制太傅第一大將軍次之太尉次之司徒故丞相也又次之司空故御史大夫也又次之西漢有三府丞相御史大夫大將軍也其後增二將軍謂之五府東漢

有五府太傅太尉司徒司空大將軍也西漢所謂三公者丞相太尉御史大夫而已其後以大將軍代太尉而以大司馬號冠之然猶一官耳東漢永元成之舊以司徒代丞相司空代御史大夫司馬代太尉為三公而大將軍位三公之上與司馬為二官矣曹操為丞相位三公上而丞相與司徒亦為二官矣東漢之末以太傅總百揆為首相太尉次之司徒次之司空次之而大將軍號或在太傅之下太尉之上有五公矣晉初以太師太

保司徒司空為文官公而以左右光祿大夫開府者為
從公大司馬大將軍太尉為武臣公而以驃騎車騎開
府者為從公有八公矣已而齊王罔之徒又自為丞相
不在八公之數則又冗矣智按江左自劉宋以後宰相
無常員惟人主所與議論政事委以機務者不論銜之
大小皆真相也陳後政事并由中書有舍人五人分掌
二十一局各當尚書諸曹並為上司尚書聽受而已荀
勗以為鳳凰池即其端矣此中書之重也北朝惟重門

下三公尚書非帶侍中銜不得聞政此門下之重也唐則並重已而遞重已而重中書云

內錄錄尚書事也 桓溫固讓內錄是也人稱會稽王

道子為東錄世子元顯為西錄東第可設雀羅言朝在西元顯執權也今詹府有錄事小官也然亦因其名孔叢子桓子新論皆以大麓為大錄

晉以後之侍中乃宰相非秦漢之侍中也 秦侍中本丞相史也五人往來殿內東箱奏事謂之侍中漢為加

官分掌乘輿服物武帝以孔安國儒者掌御唾壺朝廷
榮之表曰侍中左右曹諸史散騎中常侍皆加官侍中
中常侍得入禁中諸曹受尚書事諸史得舉法散騎騎
並乘輿車給事中亦加官志曰屬少府比二千石周禮
太僕千寶注曰若漢侍中西漢侍中有嚴朱東方吾丘
蘇武歐陽地餘王商師丹諸人班穉為黃門郎中常侍
朱穆曰中常侍故事參選士人建武以後悉用宦者矣
晉志曰黃帝時風后為侍中周為常伯之任秦漢無定

員後漢曰侍中寺即門下省也冠武弁大冠加金璫附
蟬為文貂尾為飾三省既立則侍中為門下省之長官
給事黃門侍郎散騎常侍俱屬門下稱曰黃散唐初因
隋為納言後屢更改總之自晉以後門下省長官即宰
相也

漢有丞相府唐宋有政事堂非今之東閣也 鄧通詣
丞相府鷓鴣雀飛丞相府是也唐志曰三省長官議事于
門下省政事堂後裴炎自侍中遷中書令乃徙政事堂

于中書省開元十一年張說為相又改政事堂號中書
門下列五房于後神宗史志中書門下在朝堂西榜曰
中書為宰相政事之所又有中書省門下省者存其名
列皇城外中書省但掌冊文覆奏考帳門下省主乘輿
八寶朝會位版流外考校而已中書令侍中不任職元
豐官制行悉釐正之乃廢中書門下省之在皇城外者
併朝堂西之中書堂為門下中書兩省以左右僕射兼
門下中書侍郎又以兩侍郎副之神宗曰中書省揆而

議之門下省審而覆之尚書省承而行之哲宗立呂公著言唐太宗以三省長官共議從之建炎三年始合三省為一按今之東閣則學士之房耳故無文移可行太府漢丞相府也以張湯甯成掾以湯為無害言大府調茂陵尉注師古曰大府丞相府也趙禹為丞相史周亞夫曰文深不可以居大府蔡質漢儀曰司徒府與蒼龍闕對厭于尊者不敢號府應劭曰不然丞相舊位在長安時府有四出門隨時聽事明帝欲依之迫于太

尉司空但為東西門耳荀綽晉官表注曰漢丞相府門無闌不設鈴不警鼓深大廣遠無節限也

唐宋政事堂皆在朝堂之西 唐門下省為政事堂裴
炎移入中書省政事堂有北門過中書舍人院咨訪至
常袞乃塞之李華有中書政事堂記言裴炎之非李庾
賦曰西則月華重啓銀臺內向中書在焉周密宰相舊
記廣德二年令射生自光範門送郭子儀注大明宮含
元殿西為光範門韓愈上宰相書伏光範門外是可推

也宋官志曰中書在朝堂西是為政事堂宋中書門下
并列于外又別置中書于禁中為政事堂與樞密院對
掌大政乾德二年置參知止令就宣徽廳上事

宰相有平章參知同三品之名唐也 尚書令侍中中

書令為宰相不輕授人常以他官假以他名貞觀八年

李靖辭位三兩日一至中書門下平章事平章事起此

蕭瑀以太子太保李勣以詹事同中書門下三品同三

品起此然二品不專用高宗以後為相者必如同三品

而張文瓘以東臺侍郎同東西臺三品同三品入銜自
文瓘始永淳元年以郭待舉等同承受進止平章事平
章事入銜自待舉等始通典曰侍中中書令為真相尚
書令則太宗曾為之郭子儀懇辭是也其以他官參掌
者但如同三品及平章事知政事參知機務參與政事
之名并為宰相即漢韓安國張湯為御史大夫行丞相
事之例也蓋高宗以郭待舉岑長倩郭一正魏玄同為
相以其資任尚淺未可與諸相同名且令預政事與中

書門下同受進止平章事此時雖不設尚書令而左右僕射即為真相同三品者次之同平章事又次之至宋時遂以同平章事為正相而以參知政事為次相然則宋之參知政事即唐同平章也元以丞相居平章事之上則猶唐始立平章之意也宋之丞相即參政也元乃以參政居左右丞之下

中書樞密宋之兩府然考漢唐之始名皆宦官也漢之中書令本宦官也至江左而為宰相唐之樞密使本

宦官也至五代時以樞密使為內輔臣宰相為外輔臣而樞密之權重于宰相如宰相兼樞密則得專大政如罷樞密之權但為宰相其任反輕亦如唐之左右僕射也蓋郭崇韜之于莊宗安重誨之于明宗然皆以佐命元功入為樞密刑賞黜陟無不由之其勢然也後晉太祖懲其橫肆遂廢樞密以印付中書而宰相之任始專矣唐初樞密之設蓋于政事堂後列五房有樞密房設以主曹務乃宰相文書之所也宣宗以後始設東西樞

密兩院以宦者為使而樞密之任歸之其權與宰相等矣唐莊宗即位以豆盧革盧程同平章事郭崇韜張居翰為樞密使始以外官為之而樞密之任親于宰相以其與聞宥密也有宋建國因五代之舊以中書為相樞密為將謂之兩府而宰相之權重于樞密矣唐末兩樞密使及左右中尉柄事禁中與宰相表裡號為中貴亦稱內大臣樞密即今之司禮中尉即今之東廠也唐金吾衛屬南衙即今之錦衣羽林衛屬北衙即今之東廠

李輔國欲選羽林騎士五百以備巡邏蓋欲以北牙禁
旅侵南牙之職故宰相李揆急奏止之輔國又署察士
數十人潛令于人間聽察細事有所追索諸司無敢拒
者魚朝恩專權亦于北軍置獄使坊市惡少年羅告富
室沒其家資則成化崇禎間之西廠矣

儀同三司同三公之三司也 東漢太尉司徒司空謂
之三司鄧騭為車騎將軍儀同三司自是南北因之有
儀同三司之名矣唐又以鹽鐵度支戶部為三司天祐

三年以朱全忠為鹽鐵度支戶部三司都制置其名始
于此三司使名始于後唐張延朗玄宗時楊國忠至兼
領數十使然未立此名也唐志凡寃而無告者三司詰
之此謂御史大夫中書門下為三司太子監國則詹事
庶子為三司

古小而今大者尚書侍郎也古大而今小者檢校提舉
也漢成置尚書官小侍郎則郎中滿三歲者後權日
重遂為公卿晉有檢校御史唐嘗加檢校尚書宋治平

二年中丞賈黯請皇子及宗室卑屬除檢校三師官熙
寧遣使提領轉運有提舉常平司又署都大提舉麟臺
故事舊有提舉官政和七年置提舉秘書省又有提舉
太史局又有提舉官觀之名今則檢校提舉皆為小職
僕射秦官其職最小後漸為宰相漢有司隸校尉城門
校尉八校尉戊己校尉而今為錦衣衛之班役

今之省中專指給事古之六部郎皆省中也 給諫原
屬門下省今六科封駁猶其遺也尚書省向謂之中臺

劉宋設在建禮門內曰內臺北齊曰都省曰北省唐神龍定為尚書省都堂居中左右分司都堂之東有吏戶禮部西有兵刑工部故稱吏部曰東曹兵部曰西曹通典曰吏兵部為前行戶刑為中行禮工為後行給事本加官劉向為郎中給事黃門六百石秩孔放李息卓茂皆為之所謂暮對青鎖門拜之夕郎也

漢之諸郎非盡尚書郎也漢官云尚書郎初從三署郎選詣尚書臺試每一郎缺則試五人先試箋奏初入

臺稱尚書郎中滿歲稱尚書郎三歲稱侍郎田蚡少為
諸曹郎是尚書郎馮唐為郎中署長直不疑盜同舍郎
金顏駟為郎揚雄為侍郎及諸言以貲為郎父任為郎
皆三署郎也曰外郎者散郎也中郎者省中郎也呂氏
曰三署五官左右也續志議郎六百石以文屬光祿勳
通典曰尚書郎西漢置四人光武分六曹并左右丞為
三十六人更直五日于建禮門內入直官供青縑白綾
被或以錦綉為之奏事明光殿含雞舌香與黃門侍郎

對揖侍郎稱已聞乃出丞郎月賜赤管大筆隃麋墨固已寵矣

依烏郎府也 晉志郎位五星在太微帝座東北一曰依烏郎府也周之元士漢官之光祿中散諫議議郎郎中是其職也後人解依烏謂為後宸樂府射烏辭言明帝東巡有烏鳴乘輿虎賁郎射中之遂令亭壁皆畫烏此附會也漢書作哀烏古時哀有依音詳見天文五花六押非今之舍人也 唐故事中書有軍國政事

則中書舍人各執所見襍署其名謂之五花判事李泌
曰給舍分司押事故舍人謂之六押蓋晉以後之舍人
即漢尚書郎魏置中書通事舍人梁去通事字隋改內
史舍人唐武德改中書舍人又稱西臺鳳閣紫薇舍人
元豐官制行遂以中書舍人判後省之事今則內閣舍
人為宰相承行與兩殿舍人皆非正途惟中書科之舍
人准考選然非昔之任矣

唐以舍人年久者為閣老非今所稱閣老也 故事舍

人年久者呼為閣老宰相相呼為堂老胡邦衡除龍圖閣學士周益公賀詩有龍圖便為黃閣老之句

學士古史之遺而任遇殊矣周官有左右史蓋今起居之本漢武有禁中起居注後漢馬后撰明帝起居注則起居似女史之任其後則近侍之臣記錄也歷代有其職而無其官後魏始置起居令學士重于唐而亦昉于後魏文帝招文儒之士置崇文館貞觀中崇文館有學士直學士員不常置也蓋自漢制侍中為侍從之選

出入禁闥掌直承明潤色典誥謀議政事已曠近矣而
禮遇猶未尊嚴也魏改秘書令為中書令監等官掌贊
誥命記會時事典作文書而晉之舍人擬為鳳池可謂
權要然所司猶冗也至有翰林則為樞機宥密之地而
業是官者清華極矣唐初設弘文館中宗用上官昭容
之言置學士四人象四時直學士八人象八節學士十
二人象十二時遊幸禁苑無不畢從大學士之名起此
至宋時即以為宰相兼其官矣蕭梁有壽光殿學士之

號殿學之名始此筆麈曰李肇翰林志曰唐翰林院在銀臺門內開元二十六年別建學士院德宗移于金鑾坡會要曰翰林院在銀臺門內麟德殿西廂重廊之後學士院在禁中凡十廳南廳五間北廳五間中隔花甃承旨居北廳第一間其任最重第三間曰槐廳相傳居此必相中書門下二省皆供奉外官隨朝士入見謂之內供奉隨翰林院班者謂之翰林供奉即今之兩殿兩房皆翰林供奉之遺法也唐自中宗以後學士之權重

于宰相如陸贄之在奉天鄭網之在貞元裴洎李絳在
元和之初皆以帷幄密謀沒軍國大計用人行政惟所
獻替及其為相寵遇反不若焉即有所建白視在北門
亦若少減地之親疎不同也漢所謂不任三公政歸臺
閣如此元大德七年郭守敬以先朝舊德累請謝事不
許自是凡翰林太史官不得致仕遂著為令彼所謂畫
林者兼有書畫供設之流所謂太史者即今之欽天監
官非詞林也今之詞林則兼古之宮僚禮官中書秘書

學士舍人著作郎起居郎螭頭珥筆之任矣宰相以本
學士而加官故無印止有文淵閣印以封進御覽此外
即支俸皆借翰林院印故于翰林院堂上設公座視相
公幾位則幾座故曰中堂智謂今時宰相無其官而有
其權地其權之漸重正似唐之學士而但論機務不論
官正似江左遼北面有大林牙院掌文翰曰北面都林
牙南面有翰林都林牙林牙亦通名如將作監都林牙
太僕有羣牧林牙

詹事春坊本宮僚也 詹事秦官掌皇后太子家成帝
省之并于大長秋長信詹事更名長信少府又改長樂
少府又有將行者應劭曰皇后卿也景帝更名大長秋
或用士或用中人後魏有太子左右詹事唐置詹事府
宋東宮有詹事少詹但品俱正六今制則詹事正三少
詹正四也左右春坊蓋沿北齊及隋有門下坊唐龍朔
改門下坊為左春坊左庶子為左中護改隋典書坊為
右春坊右庶子為右中護左右諭德唐置以擬散騎常

侍貞觀改中書舍人為中允龍朔改贊善今並存其名
司經局自晉以來有之梁之典經局唐之桂坊也皆以
洗馬領之元有太子司經其曰校書正字昉于劉宋至
北齊有太子校書郎隋司經局置正字二人由唐宋以
後宮僚可謂多矣近日則以翰林兼充之侍讀侍講則
始于開元三年命馬懷素褚無量更日侍讀遂置此名
而宋仍之漢有太子家令寺十率府衛太子率更令太
子僕今皆省但有舍人每正旦東宮于文華門之左門

設坐受朝賀則舍人及東宮鹵簿衛立皆選良家子為之非官也十率府率更之率胡三省音所律反者是升菴弱侯音律者非

秘書著作史館前代分之今則皆詞林事也拾遺記黃帝有四史宋衷世本曰沮誦倉頡為左右史呂覽淮南皆言夏太史終古殷太史向摯周有五史侯國亦置如蘇墨屠黍倚相廖虢是也秦有太史令漢武始置談遷為之宣帝以其官為令行太史公文書修撰之職以

他官領于是太史之官惟知占候而已王莽改置柱下五史後漢至隋惟魏明太史中史職隸中書其餘多隸秘書唐武德因隋屬秘書省著作局貞觀移史館于門下省宰相監修李元紘奏罷史職其修撰史事以他官兼領宋以宰相監修修撰直館檢討無常員修撰以朝官充直館檢討以京官以上充掌修日歷及典修圖籍之事凡國史別置院于宣徽北院之東以藏之謂之編修院天聖修真宗史宰相提舉編修官以三館秘閣校

理以下及京官充事畢即停麟臺故事曰寶錄院提舉如國史從官為修撰餘官為校討修撰之名始于唐張昌齡為北門修撰孫逖為集賢修撰蔡京分修撰為三等直閣為六等此皆謂之貼職漢圖籍所在有石渠石室延閣廣內貯之于外府又有中丞居殿中掌蘭臺秘書及麒麟天祿二閣藏之于內禁後漢圖書在東觀桓帝始置秘書監一人屬太常晉武併入中書省惠帝復別置自是秘書之省始居于外東晉元康四年除著作

佐郎著作西觀撰晉書隋秘書省領著作太史二曹龍
朔改蘭臺太史天授改麟閣神龍復舊其後國史太史
分為別曹而秘書但主書寫校勘矣宋建崇文館招文
院端拱初建秘閣其實秘書郎校書郎著作郎正今之
史館也劉向校書揚雄典校已有其任而未設官名馬
融為秘書郎詣東觀典校書蔡邕拜郎校書東觀是即
校書郎也魏明帝太和中始置著作郎官隸中書省掌
國史後又置佐郎劉劭為秘書郎出乘鹿車王肅表論

秘書丞郎乘鹿車此魏制也唐龍朔為司文郎中咸亨
復舊宋初為寄祿官元豐定名始有職掌修纂日曆祭
祀祝詞則著作郎佐之職略曰初除林希為大著豐稷
為小著是也其刊寫分貯集賢院史館昭文館秘閣則
秘書郎主之高承以侍讀起于明皇吳曾引陶弘景為
侍讀起于梁

漢有講郎侍講之所自也 章帝詔高才生雖不立學
官然皆擢高第為講郎張輔子蕃以郎侍講趙典拜議

郎侍議禁內此其端矣

病坊言其間也 類要曰唐以秘書監望雖清雅而實非要劇以監為宰相病坊丞及著作郎為尚書郎病坊秘書郎及著作佐郎為監察御史病坊

大蓬言其仙也 鄭氏談綺曰秘書監曰大蓬後漢鄧章傳時稱東觀為老氏藏室道家蓬萊山王元長曲水序記言事于仙室謂藏室也

視草起草也 淮南王安傳上報書及賜令相如等視

草尚書郎主作文書起草沈括筆談曰學士院有視草臺每草制則具衣冠據臺而坐唐有視草亭唐太宗屬文遣上官儀視草詩人號上官體李德裕傳安邑里第有起草院

兩制者翰林學士為內制中書舍人為外制李之儀姑溪集答吳子陽書曰唐開元末以翰林供奉為學士入院一歲遷知制誥不作文書但備顧問參侍行李而已廷班隨本官若侍宴則座次宰相下故學士號內相

其知制誥謂之內制用白麻寫從內降付外廷宣讀中書舍人是宰相屬官其知制誥謂之外制押案遇有所命則申之以詞而行下者也今官制行此等合改正智按此書則當時亦未改正矣後晉天福五年詔翰林學士院公事直并歸中書舍人自是舍人晝直者當中書制夜直者當內制至齊王開運元年復詔翰林學士與中書舍人為兩制各置六員唐永徽中命學士一人待制宋景德置龍圖閣待制天聖有天章閣待制治平有

寶文閣待制楊徽之等兩制皆預故事學士二員分直
有大除拜過二制上則並召二員謂之雙宣又曰雙日
鎖院隻日降麻故亦謂之雙鎖能改齋漫錄曰武后謂
員半千宜留待制此其始也漢但名待詔所任亦遠

神鈴鈴索也 蘇續志唐學士院深嚴人不可入中夜
宣事必先動鈴索長慶中河北用兵鈴夜作聲鳴急則
兵事急鳴緩則兵事緩李德裕詩曰銀華懸院榜風撼
引繩鈴

摘文堂即玉堂之署也 元城語錄太宗飛白書玉堂

之署四字玉堂殿名疑武帝所造李尋傳曰久汙玉堂

之署宋英宗曾撤去吳草廬秘笈云元豐中有學士乞

摘去下二字榜院門詔可是乞以殿名名其署也續會

要云徽宗政和五年御書摘文堂榜學士院有花磚道

在北廳前堦日影及五磚為入直之候李程嬾故號八

磚

假龍老龍大小龍皆龍圖之稱也 方勺曰舊制直龍

圖閣謂之假龍待制謂之小龍直學士謂之大龍學士
謂之老龍總呼龍圖葉夢得曰亦稱龍閣龍學又曰吏
部尚書補外則除龍圖五曹則除樞密直學士相呼謂
之密學

得周官六典之遺意者今日之六卿也 石齋黃公曰

莽做古矣然羲和司農納言合為一官秦做古矣然冢
宰司徒司伯係之三公斯豈古乎魏道武取雲鳥之號
唐則天取鸞鳳之名皆泥古而不通于今前代亦有六

部然屬于省中唐戶部無版圖兵部無戎帳虞水不管山川金倉不司錢穀而職名虛設宋既有吏部又有審官院既有刑部又有審刑院既有兵部又有樞密院既有工部又有三司使而分散不一誠不若近制遠矣隱史曰黃公以周禮二千餘年僅見行于今日愚獨嘆者缺第一事也一者何奄寺不統于冢宰雖有鐵牌庸能不徹乎鄭端簡曰折一相而六此其初意詎知學士加官之為真相邪周官冢宰之權固重矣然自舜禹以來

司空即為冢相智別有論周官大體是而文字不必盡
信誠如朱子論其內外相維之善誠如鄭節卿所論而
瑣屑不必相倣則誠如馬貴與所論矣宋鄭伯謙字節
卿作太平經國書發明周禮徐九一重刻之又按古時
命官六卿有人公孤之人不別見是知公孤即六卿而
立之猶今六部加師保也

省眼天官也 選司亦謂之南曹亦謂左曹司勳亦謂
勳府亦謂右闈劉禹錫為韋陟神道碑云是曹在南宮

為眉目在選士為司命鶴廳考功廳也唐考功員外廳
事有薛稷畫鶴故云今吏部有古藤或稱藤軒

版部地官也 亦稱民部魏有嚴部郎中唐司徒四屬

曰戶部曰度支曰金部曰倉部唐張博濟為戶部郎中
部有考堂天下歲會計處司金亦稱司珍司倉亦稱司
庾司儲唐戶部侍郎有二員判使按者別一署謂之左
戶

容臺春官也 唐虞曰秩宗商容為商禮官故稱容臺

漢郡國有容史舊說禮部郎中掌省中文翰謂之南宮
舍人杜牧頃求小儀小秋不遂鄭谷寄同年詩小儀澄
澹轉中儀故今以為禮部司務之稱石林燕語禮部郎
中元豐官制行謂之名表郎郎官別有印曰名表郎印
春明退朝錄云禮部員外為瑞錦窠因話錄云祠部呼
冰廳言其清冷也冰去聲

五兵夏官謂中兵外兵騎兵別兵都兵也 魏始置五
兵尚書晉太康又置七兵尚書以中外兵加分左右也

都官秋官也 漢成帝置三公曹主獄亦曰賊曹劉宋三公比部皆主法又置都官尚書主軍刑獄領都官水部庫部功論四曹開皇始改刑部唐因之天寶改為憲部亦曰西臺亦曰白雲司

起部冬官也 共工冬官漢魏領于民曹自晉迄陳有所營作權置起部尚書後竣則省隋始置工部尚書唐因之領工部屯部虞部水部四曹屯田一曰司田

通雅卷二十三